

元氏出集三卷



元代史書 二卷

元
代
史料
叢刊
初編

黃山書社

西夏書事卷二十五

青浦 吳廣成西齋 纂

元豐四年

遼太康七年

夏大安七年春二月以計間鄜延

將劉紹能

紹能世爲諸族巡檢忠勇第一秉常嘗以計招誘并其副李德平皆拒不應乃設疑間之邊臣以聞神宗手詔云紹能戰功最多爲夏國所畏欲害之耳紹能捧詔感泣不已

三月月犯東井

西夏書事

卷二十一

入于鉞

將軍李清謀以河南地內附梁氏殺之

秉常以愛行漢禮爲梁氏所惡梁乙埋等皆不悅

將軍秦人李清說秉常以河南地歸宋秉常從之

將使入奏梁氏知其事與幸臣罔萌訛謀置酒誘

清執而殺之

王氏東都事畧云李將軍者爲秉常誘漢娼婦樂人梁氏執殺之與宋史

夏國傳異

按

清本秦人入夏之由史不可攷然能不忘故

國說其主籍土歸朝事雖未成志則可取書官

書殺皆子之也

梁氏幽其主秉常復視國事

梁氏既殺李清幽秉常于興州之木峇距故宮五

里許

種諤奏議西夏國母屢止秉常不行漢禮秉常不從有梁相公者與其叔母亦相繼勸既

而秉常爲李將軍激怒欲謀殺梁相公與叔母事露梁相公與叔母共謀置酒召秉常醉後被害其妻子及從者數百人俱遭屠戮與宋史夏國傳異

令乙埋與罔萌訛等聚

集人馬斬斷河梁不通音耗于是秉常舊時親黨

及近上用事諸酋各擁兵自固乙埋數出銀牌招

諭不從國內大亂

西夏書事

卷二十一

二

按秉常梁氏子書幽其主絕梁氏于秉常也秉常誤聽清言殺清絕之于事已定梁氏必幽之而奪其政直藉以行其私耳豈真爲宗社計哉書復視國事誅其心也

夏四月環州來索叛蕃執還之

慕家族首領迎逋黠很難制與梁乙埋謀數縱兵侵掠知環州張守約走馬承直陸中勒兵與戰擒之及其黨三十六人餘衆二百遁匿夏國守約駐兵境上檄取不置居數日韋州監軍都嘏盡械以

獻斬于環州市

此事見張守約及俞充傳不得其時據秦鳳爲俞充子次阜作紀在

三年四月而神宗御集環慶經畧司奏張守約死到幕家族背叛首領頭級并招降三千餘人歸族

住坐乃四年四月十九日

五月統軍禹藏花麻移文熙州請討梁氏

花麻素不悅梁氏見秉常失位移文熙州稱夏國

母子不協殺其重臣上下泶泶若發兵來討請舉

族以應神宗詔知州苗授諭使人云諸路探報夏

國變亂所說不一今河南北阻隔人情去就爾次

第寫一文字計會因厚資遣還

六月保安軍移牒來詰

鄜延總管种諤奏秉常被囚宜興師問罪神宗召
諤入對諤大言曰秉常孺子往持其臂而來耳神
宗壯之決意西討命宣州宣慶使李憲爲經制使
出熙河行營經畧使高遵裕出環慶副總管劉昌
祚出涇原簽書經畧使事內侍王中正出河東諤
出鄜延先令保安軍以經畧司命牒宥州曰夏國
世世稱藩朝廷時與歲賜比年以來遵奉誓詔謹
修職貢恩義甚至今聞國主爲強臣所制不能專

命國事亦未能懸測存亡今朝廷將差降賜生日
及仲冬國信使入界未審至時何人承受及本國
見今何人主領請速具報以須聞達益以嘗夏國
應答之辭也梁氏不報

秋七月太白晝見

經天行識者指爲兵象

以兵襲西蕃西囉谷

西囉谷西蕃斫龍城所屬在守巴堡南梁氏以國
中內亂恐西蕃窺其隙令三頭項人直抵西囉谷

西夏書事

卷二十五

四

劫制蕃部西平節度使董璫使養子阿里骨率兵擊之斬三百級降百二十三人

八月遣使至綏德索降人

初中國下詔招納西人頗多降附酋長或下令禁止或逼之遠徙使不得近邊蕃部訛麥等十餘人家屬百口潛從大理河北內投梁氏令人數至綏德索之种諤帥所部駐綏德城外遣諸將招接降人乙埋盛兵決戰不勝

遂犯臨川堡

乙埋復以二萬餘衆渡無定河攻臨川堡走馬承
受楊元孫力戰拒之

復掠豐州

執弓箭手沈興等數人河東經畧司請移牒理索
神宗以業已兵討更勿行牒命降敕榜招諭夏國
曰睠茲西夏保有舊封爰自近世以來尤謹奉藩
之職恐奸臣之擅命致弱主之被囚迨移問其端
倪輒自墮于信約暴驅兵衆直犯塞防在神理之
莫容固人情之共憤方切拯民之念宜興問罪之

師已遣將臣諸道並進其先在夏國主并鬼名諸
部族同心之人並許軍前拔身自歸及其餘首領
能相率效順其誅國仇隨功大小爵祿賞賜各倍
常科仍許依舊土地坐住子孫世世常享安樂其
或抗拒天兵九族並誅無赦蓋天道助順必致萬
靈之歸王師有征更無千里之敵咨爾士庶久罹
困殘共堅向化之心咸適更生之路敢稽朕命後
悔何追

禹藏花麻走興慶府部酋訛勃哆等以西使城降于

熙河經制使李憲

禹藏花麻聞李憲出熙河已與西蕃首領洛施軍

篤橋阿公等將兵入境

宋史董種傳以王師討夏遣酋長抹征等率三萬人

赴党龍耳江及隴珠珂諾與官軍會與神宗紀異

率所部出戰佯敗西走

訛勃哆等三人及首領厮都囉潘二十餘人兵萬

餘舉西使城降乙埋遣兵數萬出女遮谷援之知

城已失登山逆戰大敗退伏壘中半夜潛走

李憲兵破龕谷九月入蘭州

女遮之敗殘卒退保龕谷龕谷城堅多窖積夏人

號爲御莊聞李憲兵至戍守奔潰憲發害取穀及
弓箭之類進兵取蘭州令新順首領巴令謁三族
分所部攻撒逋宗城破之遂上言蘭州古城東西
約六百餘步南北約三百步距西使城約百五十
餘里將至金城有天淵五六重僅通人馬自夏人
敗衄之後所至部落皆降今招納已多請築城建
帥府以固羌夏之心神宗從之版築方興夏人隔
河而營憲令死士絕河斫之遂引退

按

昔人謂蘭州控河爲險隔闌羌戎自漢以來

河西雄郡金城爲最豈非以介居戎夏攸繫隴
右安危哉晉元康後河隴多事金城左右歲無
寧宇隋唐盛時馳逐河湟未嘗不以蘭州爲要
害廣德以後州沒吐蕃而西涼不復爲王土大
中間雖嘗收復亦僅羈縻宋興蘭州不入職方
至是憲始復之築城以建帥府後元祐初夏人
求復此地朝議欲割以畀之孫路言自通遠至
熙州總通一徑熙之北已接夏境今自北關城
蘭州然後可以捍蔽若捐以與敵則一道危矣

穆衍言蘭州棄則熙州危熙州危則關中震動
唐失河湟西邊一有震動驚及京師今若委蘭
州悔將何及遂不果棄夏人卒無以逞則憲城
蘭州斷西界之要衝壯北門之鎖鑰正不得以
人而廢其功也

遣梁永能帥師援米脂砦敗績冬十月米脂守將令
介訛遇以城降石州亦不守

梁氏聞漢兵四出分遣諸監司兵委大帥梁永能
總領拒之永能析作三溜一以當戰一以旁伏一

以俟漢兵營壘未定伺隙突擊又于通道塹絕山谷設爲阻險守備甚謹及中國師期屢改永能屯禦久不得一戰使人持嫂書投郾延境上激之种諤遂率本部及畿內七將兵九萬三千出綏德路攻米脂甫三日永能兵八萬赴援諤張左右翼奮擊永能大敗兵士相蹈藉于無定河水爲不流城中將令介訛遇猶堅守諤密遣謀說降奈壁守將衣以文錦導行城下訛遇乃出降獻戎樂四十二人諤送之京師進圍石州州將棄積年文案簿書